

Persona cu Achondropasie no ta registra na ningun facilidad y tambe ta wordo discrimina

Sondeo di persona cu 'Achondroplasie' a wordo entrega na Minister di Asuntonan Social



ORANJESTAD (AAN) : Centro di desaroyo pa hende muher (CEDEHM) a mira e necesidad di haci un sondeo riba personanan cu Achondropasie den nos comunidad. Achondroplasie, cual ta e termino cientifico, ta wordo considera personanan chikito di estatura. Charlaïne Odor, un hoben cu Achondroplasie den nos comunidad, a bati na porta di CEDEHM pa yudanza debi cu e no ta haya trabao y tampoco ta mira ningun hende cu tin e mesun estatura, cu e lo por a acudi na dje pa ayudo, y a pensa cu e ta unico na Aruba.

E situacion aki a pone CEDEHM haci un sondeo den comunidad di cuanto persona cu Achondroplasie Aruba tin, kico ta nan situacion den comunidad y pakico nan no por haya trabao como tambe kico e futuro pais di Aruba tin pa ofrece na nan como persona cu un desviacion genetico. Sra. Farrah Boekhoudt a presenta e sondeo hunto cu Charlaïne Odor, kende ta e factor principal pa CEDEHM cu cuminsa cu un iniciativa asina importante ariba nos isla. Adoni Marketing & PR a aporta na traha e encuesta y a hasi un analysis social y general unda sigur lo por yuda e personanan cu Achondroplasie den nos comunidad. Minister Demisionario di Asuntonan Economico, Social y Cultura, Michelle Hooyboer Winklaar, y directora di CEDEHM, Sra. Sandra Brouwn, a ricibi e sondeo aki for di man di Sra. Farrah Boekhoudt y Charlaïne Odor cu a traha duro hunto pa trece e informacionnan necesario.

E sondeo no tabata uno facil, ya cu personanan cu Achondroplasie ta dificil pa haya

den publico, pero a logra haya cuater en total, di cual nan mayornan a habri porta pa CEDEHM y asina a haya conocimiento encunto e trato di comunidad y a conoce nan mas di cerca.

Di e resultado por wordo conclui, cu personanan cu Achondroplasie no ta registra na ningun facilidad, ni na Hospital como tampoco na Wit Gele Kruis, cual ta pone cu no por trece yudansa den e parti medico y social. Pa loke ta trata nan situacion financiero, riba un base temporal y mensual ta wordo yuda cu un bijstand di Afl.410 debi cu nan no ta wordo considera personanan incapacita cual ta pone cu nan mester busca un trabao. Personanan cu Achondroplasie ta personanan hopi sensitivo y ta gusta arte. Comunidad ta gusta ter y discrimina nan aunke cu nan tin un bon estudio.

Nan no ta haya ayudo financieramente facil cual ta laga nan economicamente instabil, unda 90% ta opta pa bay biba pafor di Aruba unda tin mas beneficio y por biba un bida mas trankil. CEDEHM ta haci un apelacion na comunidad pa tin consideracion cu personanan cu Achondroplasie y habri porta pa nan por haya trabao y tambe pa nan por tin un bida normal na nan propio pais. Minister Demisionario, Michelle Hooyboer Winklaar ta felicita Sra. Farrah Boekhoudt y alaves ta orguyoso di Charlaïne cu a tuma e curashi di bati porta na CEDEHM y cu lo kier mira un solucion pa su problema, pero tambe concientiza e comunidad cu nan ta existi y cu nan tambe tin mesun derecho cu cualkier otro persona cu ta busca trabao den nos comunidad.

